


Raffi Gregorian prisustvovao završnoj javnoj debati o ustavnom amandmanu za Brčko



«Ovaj ustavni amandman okončava proces započet u skladu sa Aneksom 2, koji je zahtijevao obavezujuću arbitražu u pogledu spora na području Brčkog, te će pomoći da se stvore uslovi koji će mi omogućiti da obavijestim Tribunal da je Konačna arbitražna odluka provedena», izjavio je danas vršilac dužnosti visokog predstavnika i supervizor za Brčko dr. Raffi Gregorian.

Vršilac dužnosti visokog predstavnika i supervizor za Brčko govorio je u Sarajevu na posljednjoj javnoj debati o amandmanu na Ustav BiH. Ovim amandmanom se Brčko Distrikt dodaje u Ustav BiH, kako je definirano odlukama Tribunala te Distriktu omogućava efektivan, direktan pristup Ustavnom sudu, istovremeno osiguravajući da nijedna strana ne može promijeniti status ili ovlasti Distrikta određene arbitražnim odlukama. Isti također i dalje omogućava dva druga načina za iznošenje spora koji se tiče Brčkog pred Ustavni sud.

U obraćanju, dr. Gregorian je naglasio da ovaj amandman definira ovlasti i status Distrikta na osnovu raznih odluka Arbitražnog tribunala i da ne mijenja status Brčko Distrikta ili BiH na bilo koji način.

«Predloženi ustavni amandman na Brčko je rezultat značajnih diskusija među velikim brojem stranaka», izjavio je Gregorian.

«Ovaj amandman ima jednoglasnu podršku svih 31 vijećnika Skupštine Brčko Distrikta», rekao je Gregorian.

Konstatirajući da su i Vlada SAD i Upravni odbor Vijeća za implementaciju mira podržali predloženi amandman, vršilac dužnosti visokog predstavnika i supervizor za Brčko podsjetio je Parlamentarnu skupštinu BiH na poziv koji je u novembru prošle godine uputio Upravni odbor Vijeća za implementaciju mira da ovaj amandman bude hitno usvojen.

«Usvajanjem ovog amandmana pomoći ćete Brčkom da garantira svoje multietničke strukture te ostvariti napredak u evropskoj perspektivi BiH», zaključio je Gregorian.